

\id 1PE

\mt KLAYA TETE SO PETRUS LO KLIK GO SAM

\h 1 Petrus

\c 1

\s Nuik: Petrus lo suey pu go

\r 1 Petrus 1:1-2

\p

\v 1 Iram Yesus lo pu go tamot, Petrus lo sam ngge kiklik go, Ki Wali Iram lo kuoy go blung nogo gabe. Kukunan ngge blo nogo, motnang sip kua go sikabung, suep lak go kalik gabe. [Yangga: nan Pontus, Galatia, Kapadokia, Asia Seguay go, nggano Bitinia sogo, naklay. \(*Nggeasui go nan-nan ngga plopinsi Turki ba so\)](#)

\v 2 Se duing! Walu so, Ki Wali Iram lo duing go, motnang mo kuoy-ngam. Nggano Blong duo yap teguop goso motnang banom so Ki Wali Newet lo yaluim go, gabe pupluok. Ngga nang sogoso: Blong Dem Yesus no kengduk go sikabung so motnang lemoy go. Nemot go kin lo pluik go, kon kua goso, Nemot go wali tap inim keng genang sogo. Taiti-klum, nenem-yakay tong kua-tong go, motnang nogo Ki Wali Iram lo mea iti. Suey gemang!

\s Nuik: Wali inim, tegadi so dok-ngam go

\r 1 Petrus 1:3-13

\p

\v 3 Seni! Woy Dem Iram Yesus go Nglangin, Ki Wali Iram gabe! Ki Wali Iram seguong nogo-a, imot lo weng go iway se iti! Se duing! Iram Yesus kebong go, tandali mo nglong go tang so, klum katu ey go imot nogo wali inim, Ki Wali Iram lo mo iti. [Ngga sik so, Ki Wali Iram tegadi pu go wali demening go, imot gabe bung-eton.](#)

\v 4-5 Se senong!

- Motnang, Iram Yesus no waysagi ey gabe mlak!
- Ngga ey, Ki Wali Iram don kangok golo, motnang wali yay suey so gabe susuing.

Seni so!

- Wali teguop, tegadi so dok-ngam go ngga motnang blong duo yap no itak genang so, Senang wali yakena no dali-dali mo ta-sing.
- Tegadi ngga go, blong-don ya kua kenip; pegop go waluk genang sogo ya kua dali.

Ngga senong go sik so, wali naklay sesuoy genang sogo ku, don ey motnang gemang bung-kesategoy.

\p

\v 6 Yang! Ngga bubung go, yakay ey motnang se. Nemot-a, ku tebot ngge ba nogo, koy-wong, iseng, maning dabui ide ey gabe lelek.

\p

\v 7 Se senong! Emas iti genang duoy blo so. No, motnang Iram Yesus no dabui lo kekeng go seni ikum genang, emas ey kua kerlam, ngga blo dega seni so! Motnang dabui lo kekeng go, emas kalik mea susuey: Emas, koy lo puit go tang so iku seni-a mea pung. Iseng tetra go ngga: [Motnang Iram Yesus no dabui lo kekeng go, emas kalik mea susuey](#):

Ngga kalik, Iram Yesus weng go ku nogo, yakay ey motnang nogo iway mea tup:

- Mot suey go!
- Mot go sui blo sono!
- Mot wali teguop!

(Nggano blong-don ey go motnang mea ip.)

\p

\v 8 Se duing!

- Nemot-a motnang lo maning kua ikum go, no, [motnang go wali-blong yakay teguop lo yam so dui ey susuoy genang so](#), motnang go klum, Blong Dem nogo gemang!
- Nemot-a nggeasui go nemu kua ikum, no, Blong Dem no dabui lo motnang gabe kekeng.
- Ngga ey, blo sik sogo wali-blong yakay teguop, lom lo ya kua pen go gabe tetra.

\v 9 Seni so, motnang mo senong: Iram Yesus no dabui iti go keng goso, motnang go wali-blong yakay teguop yam so dui ey susuoy genang so, nggeasui go Ki Wali Iram lo gabe wawi go seton.

\s Nuik: Susuoy genang tap nabi lo ikum go mo pen

\r 1 Petrus 1:10-12

\p

\v 10-12 Se senong! (*Banim nogo, Ki Wali Newet go don lo, wali tap ikum gono, ibe nogo Israel go nabi-nabi lo gemang pen-neakam.)

\p

Banim go, nabi-nabi ba sogo Woy Dem go waglo lo taling go, susuoy genang wali tap, ngge ikum go mo pen-nengam:

- *Yansi weng genang Iram, tegadi so dok go, iseng se lek.*
- [Nggano, Ki Wali Iram go blong-don ba sono Nemot mea degut.](#)
- [Ngga no Iram so mea susuing.](#)

\p

No, esang! Nabi-nabi tang go, senong genang sogo, kangok so mo usey-neakam: *Nando-a ngga kalik ya lemoy?* Nggano: *Kaning so ya lemoy-ayun?*

\p

No, usey-neakam ngga (Ki Wali Iram senong go), nabi-nabi no pen go:
“*Motnang lo uwet go ngga, motnang nogo so kua, no yansi go sikabung nogo so motnang lo ikum go.*”

\p

Blong duo yap, se senong! Ngga, motnang nggeasui go sikabung nogo so pen go! Tegadi pu go Iram weng genang ngga, Yesus gabe. Se senong! Motnang nogo, deguo teguop ngga pepen go tamot lo, suey so nenguon so mo taling. Ngga, tebadali kua pepen gemang, no, blo sik sogo Ki Wali Newet go don lo, deguo teguop ngga, pepen klong go gabe. Yang! Tegadi ngga senong genang sogo, Ki Wali Iram sik sogo Wali tamot, kangok so gemang duduing dali.

\s Nuik: Kon kua goso wali suing genang

\r 1 Petrus 1: 13-19

\p

\v 13 Iram Yesus pung genang dabui-a, dali-dali se duduing! Nemot go blong ba lo weng gono, taiti, wali-inim, Ki Wali Iram lo iti genang-a, wali wegeng-a, dabui klaya iti go se bubung!

\p

\v 14 Yang! Duo-yap lo tup-duk go kalik, Ki Wali Iram nogo suey so motnang se keng! No, banim go duduing, Ki Wali Iram maning kua senong go lo, motnang kua lek! Yangga, banim go duduing-a, mot tang golo mlak genaning.

\v 15 Se duing! Ki Wali Iram Klay-kim, dui ey, kon kua tebok goso, Nemot gabe got-ton. Motnang Nemot lo mo kuoy go gabe. Ngga sik so se senong: Kon kua goso motnang-a se uwali!

\v 16 Yang! Wali Sam Klaut ba no mo klik:

\q <Genam kon kua senong go kalik, motnang naklay kon kua dali goso, se!”

\p

\v 17 Yang! Sikabung naklay nogo kisebui Ki Wali Iram tang golo, mea iti. No, nemot go-nemot go tasam sik so, ikum go, tang ey kua pleng goso, Nemot lo mea taling. Ngga tang so, suey so ngge se duing: (Dewi ba no), Ki Wali Iram so, motnang lo usi go: “Aya!” (Ngga dabui lo u-usi go,) kukunan blo nogo sip kua go kalik maning uwali go nogo, Wali Aya go suong ku nogo, suali ey motnang se ip dali!

\p

\v 18-19 Motnang tandali ngge se duing! Motnang sesuoy so, babuasi lo waluk go wali sik sogo, Ki Wali Iram lo ta mo plet-lak. Ngga drang-senang waluk genang sogo lo kua king. No, Iram Yesus kin pi golo, naklay mo semu. Nemot, Domba Nok kon kua go kalik, naklay suey seni.

\s Nuik: Ki Wali Nebut lo, wali inim mea lemoy

\r 1 Petrus 1: 20-25

\p

\v 20 Blong duo yap, se tup!

- Kukunan maning kua semu gono, Blong Dem tang go-a, Ki Wali Iram lo mo kuoy.
- Nggeasui go, ku yam sogo no, motnang wali genang, kukunan blo sono, Nemot mo pung gabe.

\p

\v 21 Se duing!

- Blong Dem, Ki Wali Iram lo tandali mo nglong gabe.
- Nggano blong teguop go ba no wawi go, Nemot ey klay gono mo suing.

Imot go wali ba no seni Blong Dem lo pupluok go tang so, Ki Wali Iram sono dabui iti go, motnang mo keng. [Nggano motnang go duduing-a, Ki Wali Iram sono tui go dali, mea senong.](#)

[Nemot lo tegadi pu go se lemoy!](#)

\p

\v 22 Dem-debui, blong duo yap! Blong Dem seni ey go tap tetaling gono tup-duk go keng go tang so, motnang go dabui kon bu, nggeasui go mo ulu. Ngga tang so. klum seni ey go, way-way sogo, blong duo yap dabui lo gemang tetaling. Kua kay! Motnang go, wali inim so lemoy go, way-way klum, dabui klaut no se!

\p

\v 23 Se duing! Wali inim ngga, sikabung sik sogo don waluk genang lo kua. No, Ki Wali Kumam lo pluok go tang so, Senang Wali Nebut ya kua waluk go don lo, lemoy go gabe.

\v 24 Se senong! (Wali Sam Klaut ba no klik go:)

\q <*Sikabung naklay, neguen un kalik. No, neguen ngga sang mea kuok. Sikabung go blong ngge, di un teguop go kalik. No, un ngga sang mea negot-sing.*

\v 25 No, Senang Wali Nebut-a, mea gigit.” Yang! Wali nebut ngga, Deguo Teguop, motnang no mo pen go, ngganemot gemang.